

**Siunnersuut uunga: Ininik attartornermi ineqarnermut tapit pillugit Inatsisartut
Inatsisaata allangortinneqarnissaannut inatsisartut aalajangiiffigisassaattut
siunnersuut**

Isumaginninnermut, Suliffeqarnermut, Nunamullu Namminermt Naalakkersuisoq

pillugu

Ilaqutariinnermut Peqqissutsimullu Ataatsimiititaliap

siunnersuutit aappassaaneerreqarnerannut

ISUMALIUTISSIISSUTAA

Ataatsimiititaliaq suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, formand
Inatsisartunut ilaasortaq Bjørk L. Kristensen, Demokraatit, siulittaasup tullia
Inatsisartunut ilaasortaq Hans Peter Poulsen, Siumut
Inatsisartunut ilaasortaq Najaaraq Møller, Siumut
Inatsisartunut ilaasortaq Mikivsuk Thomassen, Inuit Ataqtigiit
Inatsisartunut ilaasortaq Eqaluk Høegh, Inuit Ataqtigiit
Inatsisartunut ilaasortaq Paneeraq Olsen, Naleraq

UPA2023-imi 22. april 2023-imi siullermeerinerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Utoqqalinersiaqarnek aamma siusinaartumik pensionisiat pillugit inatsisissatut siunnersuut 1. juli 2022-imi atuutilersinneqartoq ineqarnermut tapiissutinik mangiaannginnissaa inatsisitigut tunngavissinneqarnissaa pillugu inatsisissatut siunnersuuteqarnikkut siunertarineqarpoq. Taamaaliormi soraarnerussutisiallit aningaasat atorsinnaasaat amerlanerulissapput, ineqarnermut tapiissutit naatsorsorneqarneranni tunngavigineqartartup qaffanneqarsimanera, ineqarnermullu tapiissutigineqartartut annikinnerulernerannik kinguneqarsimanera pissutigalugu.

Inissiani attartortittakkani ineqarnermut tapiissutinut tunngatillugu soraarnerussutisialinnut siusinaartumillu soraarnerussutisialinnut immikkut ilanngaataasartoq maannakkut isertitanut naleqqiullugu piffissami *1. juli 2022-miit december 2022-mut* utoqqalinersialinnut siusinaartumillu pensionisialinnut 4.100 kr-iniit 13.100 kr-inut aamma 9.660 kr-inut qaffanneqarnissaannik siunnersuut kinguneqassaaq. 2023-imullu immikkut ilanngaataasartoq utoqqalinersialinnut siusinaartumillu pensionisialinnut 14.717 kr.-inut aamma 12.579 kr.-inut annertussusilerneqassalluni. Ukiumut 2024-mut siumullu isigaluni ilanngaammut aningaasat tassaassapput, ukiup siuliani ilanngaammut aningaasat ukiumi utoqqalinersianut siusinaartumillu pensionisianut iluarsiisummik ilallit.

Siunnersuutip Inatsisartunit siullermeerneqarnera

Siunnersuut tigulluarneqarpoq ataatsimiititaliamilu suliarineqartussanngorlugu innersuussutigineqarluni.

Tusarniaanermi akissutit

Siunnersuut piffissami ulloq 13. marsimiit ulloq 20. marts 2023-imut nittartakkakkut tusarniaassutigineqarpoq. Tamatuma saniatigut siunnersuut Avannaata Kommunianut, Kommune Kujallermut, Kommune Qeqertalimmut, Kommuneqarfik Sermeersuumut aamma Qeqqata Kommunianut tusarniaassutigineqarpoq.

Tusarniaanermi akissuteqaammik ataatsimik Kommuneqarfik Sermersuumeersumik takkuttoqarpoq, oqaaseqaatigineqartullu kingunerisaannik inatsisissatut siunnersuummi Naalakkersuisut allanguutissanik suliaqarlutik.

Siunnersuutip aningaasatigut kingunerisassai

Aningaasaqarnikkut allaffissornikkullu kingunerisassat pillugit Naalakkersuisut allapput, siunnersuutigineqartoq ineqarnermut tapiissutit pillugit konto-mut aningaasaliissutinut allannguissamik pisariaqartitsinissamik kinguneqarnaviangitsoq. Tamatuma saniatigut Naalakkersuisut allapput, siunnersuutigineqartoq kommunit allaffissornerulernerannik kinguneqarnaviangitsoq.

Inatsisip allannguutaata atuutilersinneqarneratigut pensionisiallit ineqarnermut tapiissutinik pisartagaqartut aningaasat tigorianaasaasa amerlineqarnerannik siunnersuutigineqartoq kinguneqassaaq, tamannalu piffissami utoqqalinersiat siusinaartumillu pensionisiat qaffaavigineqarnerannit ineqarnermut tapiissutit ilaatigut mangiarneqarneranniit atuutilissalluni. Ineqarnermut tapiissutinik annertussusiliinermi inigisamut akiliutigisartagaq qanoq annertutiginersoq inoqutigiillu qanoq isertitaqartiginersut apeqqutaasarpog aammalu siunissami ineqarnermut tapiissutit annertussusaasa aalajangersaaviginissaannut utoqqalinersianut siusinaartumillu pensionisianut iluarsiiissutit attuumassuteqarunnaarnerannik siunnersuut kinguneqassalluni.

Isumaginninnermut, Suliffeqarnermut, Nunamullu Namminermut Naalakkersuisumi paasissutissiiviusumik ataatsimeeqateqarneq

Ulloq 21. april ingerlanneqartumi paasissutissiiviusumik ataatsimeeqatigiinnissamut ataatsimiititaliaq qaaqusaavoq. Ataatsimiinnermit atortorineqartut isumaliutissiissummut ilanngussatut ilanngunneqarput.

Ataatsimiititaliap siunnersuummik suliarinninnera

Tunngaviusumik utoqqalinersiat qaffaavigineqarnerisigut siusinaartumillu pensionisiat annertunerpaat 1. juli 2022-imi atuutilersumik tunniunneqarnerisigut utoqqalinersiallit siusinaartumillu pensionisiallit tamakkiisumik pissarsisalernissaannut inatsisitigut malunnaatilimmik akimmisaarutaasup maanna inatsisaasup allanngortinneqarneratigut iluarsiniarneqarnera naammagisimaarlugu ataatsimiititaliamit maluginiarneqarpoq.

Ataatsimiititaliap inassuteqaatai

- Ataatsimiititaliaq isumaqatigiittoq siunnersuutip akuerineqarnissaa inassutigaa

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Mala Høy Kúko
Siulittaasoq

Björk L. Kristensen
Siulittaasup tullia

Hans Peter Poulsen

Najaaraq Møller

Mikivsuk Thomassen

Eqaluk Høegh

Paneeraq Olsen